

lemak untuk memalingkan keyakinannya dan kepercayaannya dalam menunaikan tugasnya bagi menyempurnakan seruan kepada jalan Allah supaya mereka tidak menjadikan pemimpin mereka orang fasik, zalim dan kafir. Orang-orang yang sifatnya begini masih banyak didapati di dalam masyarakat kita dan masih terus berjuang menyampaikan seruan Allah dan ajaran Junjungan kita Muhammad (S.A.W) selagi ada hayatnya dengan Allah Ta‘ālā dan meyakinkan bahwasanya Allah akan menolong dan akan mengemukakan mereka yang menolong agama Allah.

Melihat kepada ketegasan dan kejujuran perjuangan mujahid-mujahid Islam ini yang terpancar di dalam dadanya pancaran iman dan menyerahkan perjuangannya kepada kebijaksanaan Allah dan berharapkan keredaan Allah itu tidak dapat ditarik kepada jalan yang terpesong, kepada gula-gula dan sebagainya dan mungkin setelah memerhati bahawa mereka ini tidak dapat dibentur maka untuk mengalirkannya kepada aliran yang dikehendaki oleh mereka maka dengan kerana ini nampaknya diuar-uarkan untuk menyatukan pelajaran-pelajaran di sekolah agama dan dipusatkan pertadbiran itu kepada Jabatan Pelajaran yang kelak akan mencorakkan pelajaran-pelajaran itu kepada aliran yang dikehendaki mereka supaya pelajaran agama itu hanya tinggal di dalam peribadatan semata — tidak lagi menjadi suatu agama yang berjiwa yang memasuki segala bahagian masyarakat yang mempunyai penuh kepercayaan bahawa agama Islam itu boleh dijadikan alat-alat boneka yang cuba dibuat oleh orang-orang penjajah dahulu untuk melemahkan orang Islam yang nampaknya ditiru oleh “orang-orang yang ada sekarang” atau golongan yang boleh disifat dan dinamakan penjajahan baru terhadap agama.

Al-hamduli ‘Lāh mungkin mujahid-mujahid yang bekerja dan bertugas memimpin rakyat itu menyedari akan apa yang mungkin terjadi kerana apabila kuatkuasa dipulangkan kerajaan, corak kebebasan mengajar agama tidak lagi

terletak kepada kebijaksanaan umat Islam sendiri dan mungkin akan timbul halangan-halangan yang diadakan untuk memundurkan pelajaran-pelajaran Islam kepada beribadah semata sebagaimana dikehendaki oleh penjajahan dahulu.

Umat Islam wajib sedar dan wajib beringat terhadap kepada umpan yang diberi untuk pemanis tetapi dalam barang yang manis itu mungkin ada sesuatu yang akan melibatkan kita kepada lembah bencana yang membawa pula kita “hidup segan — mati tak mahu” dan sentiasa di dalam arahan orang lain.

Mudah-mudahan Allah memberi taufik dan hidayah kepada tok-tok guru agama, ustaz-ustaz dan alim ulama yang berjihad kepada jalan Allah semata menjalankan tugasnya, mencelik dan mendidik umat yakin pada jalan Allah dan semoga Allah akan melimpahi rahmat-Nya dan menetapkan hati mereka di dalam perjuangan mereka kepada jalan Allah Amin!

Qalam Bahagian *Tabligh*

Dengan sukacitanya dimaklumkan bahawa Qalam telah mengadakan *tabligh* untuk memberi syarahan-syarahan percuma kepada kaum Muslimin terutamanya di Singapura. Syarahan dengan bergambar — *slide* — diberi dan pelaung suara disediakan. Sesiapa yang hendak meminta syarahan beserta gambar, berutuslah kepada Qalam — datang sendiri atau berutus dengan nombor telefon 41118. Tidak ada sewaan atas pelaung-pelaung suara dikenakan.

Sudah Siap:

PERSURATAN MELAYU III

\$7.00 sa-naskhah

Penerbitan Qalam: